

卷之二

五十四

三十一

九

天地玄黃

容類目鼻

康節先生皇極經世書東史補編通載卷之九

東陽申翊聖編

經世之百二千二百七十八

甲午元世祖至元三十六年○高麗忠烈王二十
十年

春正月帝崩夏四月皇孫鐵木耳即位于
上都冬十二月太傅知樞密使伯顏卒

○春正月王與公主在元○世祖皇帝
崩于上都迎皇太子即位王請歸耽羅
帝許之八月王還○船運米前後三萬

五百碩于遼陽先是元為東征運江南
米十萬碩在江華遼藩告饑帝詔以五
萬碩運賑

乙未改元元貞夏閏四月蘭州河清

○遣大將軍劉福和等送錢幣于世子
時世子請婚其費不貲科斂朝士白金
又減慶尚道租稅白金一斤折米三十
碩徵求火急又全羅忠清兩道家抽麻
布以軍糧抑買齎一萬四千匹航海往
益都府市楮幣○世子至自元以世子

判都僉議密直司事洪子藩知都僉議
司事世子署事於都僉議司及入朝于
王士庶人遮道擁馬上書訟寃馬不得
前○監察御史許有全被讒囚巡馬所
將撻于市無敢救者巡馬指諭高宗秀
乃白王曰監察為王耳目糾彈百官今
以小人之讒撻于市人以上為何如主
再三譬解得免

丙申

○王夜宴于香閣見壁上海宗夜宴圖
謂左右曰黨人雖君小國遊宴安可不

及明皇自是夜以繼日奇巧淫技無所
不至又以羅綃二十匹至宴日則粧飾
花階久則換之時有梁州妓謫仙來者
得幸於王一日內宴唱歌詞太平曲王
變色曰此非能文者不能誰為之耶妓
對曰妾之兄弟金元祥朴允材所製也
王喜曰有寸如此不可不用遂除金元
祥通禮門祗候允材權務○賜前密直
閔漬米一百碩王嘗遣內僚高汝舟令
漬製詩漬饋汝舟白酒青菰汝舟還白

其清貧故有此賜○王與公主如元世子尚晉王甘麻刺女寶塔實憐公主幣用白馬八十匹又獻太后及晉王各白馬八十一匹晉王將之國帝幸其邸餞之王侍宴酒酣王起舞公主歌之

丁酉改元太德秋七月河決杞縣浦口

○元刷遼東路己未年以後被擄及流民三百五十戶歸○五月丁卯王與公主至自元時壽寧宮香閣芍藥盛開公主命折一枝祀翫良久感泣壬午公主

薨世子自元奔喪殺閹人成陶咒等四
人又治巫蠱事殺宮人無比稍得呪詛
狀悉斬之國人震懾

戊戌

○春正月元遣成寧侯王維詔王傳位
于世子封王為逸壽王世子諒即位○

王率百官奉牋上尊號太上王居德慈

宮○王下書徵前司諫李承休○罷政

房以翰林院主選法令學士崔昂等四

人及承旨金昇掌銓選○改官制以趙

仁規為司徒侍中叅知光政院事洪子

藩為左僕射參知政院事罷承旨房
以出納委之詞林院○賜詞林學士朴
全之吳漢卿侍讀學士李瑱侍講學士
權永紅韉王常屏左右幸詞林院與四
學士商確政理手賜酒食從容盡日或
至夜分賜紅燭送至其家○公主遣徹
里如元奏趙仁規妻呪詛之事帝遣使
執仁規及趙妃以歸○都僉議參理柳
陞卒陞敬子也容止可觀事親以孝居
官以勤於聲色淡如也時禮文散失陞

撰新儀甚詳後人遵用之○八月元遣
李魯元等來趣國王公主入朝王與公
主將如元上王餞于金郊酒酣李魯元
以帝命取國王印授逸壽王幸壽昌宮
受帝詔復位李魯元之來十日而國人
不知有此詔○下左司諫秋適獄時聞
人黃石良黃緣用事與適有怨讒之王
怒即令繫囚巡馬所押者欲由徑行適
曰凡有罪者皆歸有司未有枷鎖于王
所者吾嘗行官道使國人見之何必效

兒婦掩面交巷乎○復舊官制

己亥

○萬戶印侯金忻等擅發兵執萬戶韓希愈等十餘人初印侯與希愈有宿怨謀傾軋之會僧日英搆誣語希愈等謀不軌侯等聞之擅發兵執希愈及上將軍李英柱等十餘人告行省左丞哈散曰希愈等將殺侯忻挾王甯海島哈散密令審驗知其妄業已執希愈請與王訊之鞫希愈凡八日竟不服惟英柱仁儉誣服日英逝侯忻與其黨將如元訴

帝王使承旨金深留之不從流希愈英
柱于海島餘皆杖之○玉狎昵羣小
好宴樂倖臣吳祈金元祥內僚石天
等務以聲色容悅選中外官妓及巫女
善歌舞者籍置宮中衣羅綺戴馬尾笠
別作一隊教以新聲天補葦各私名妓
日夜歌舞褻慢無復君臣之禮○以中
贊宋玠監修國史安裕修國史閔漬同
修國史

庚子

○上洛公金方慶卒○閩里吉恩欲葺

本國奴婢之法王上表云我始祖垂誠
後嗣凡此賤類其種有別若許從良必
道仕路謀亂國家由是小邦之法八世
戶籍不干賤類然後乃得筮仕凡為賤
類永勿許為良伏望仍舊俾從國俗吉
思擅權納賂自宰輔以下稍許於心或
杖或囚一國之人無不行賂

辛丑

○併省內外官其官各有同上國者悉
改之又以芟黃代赭袍紅傘代黃傘除
舞蹈警蹕之禮○慶尚道按察使朱印

遠貢二十升黃麻布王令左右爭取為

戲○僉議致仕薛公儉卒公儉廉勤好

禮朝官有喪不論知否必往吊有造謁

者無貴賤倒履出迎嘗卧疾蔡洪捨入

卧内問疾布被莞席蕭然若僧居出而

嘆曰自吾輩而望公所謂壤虫之與黃

鵠

壬寅春正月免朱清張瑄官尋誅之

癸卯春三月召蘭谿處士金履祥

○元遣斲事官帖木兒不花翰林李學

士來命崔有滄韓希愈執石甯及其子
天補等赴京時吳祈以讒佞得幸於王
洪子藩元冲甲等率三軍圍王宮執吳
祈送元○王聽宋璘之謀請入朝欲沮
前王忠宣還國又請以公主改嫁端興
侯璵欲為後至西京帝不許入朝乃還
○元遣兵部尚書塔察兒翰林直學士
王約來謂王曰天地間至親者父子至
重者君臣彼小人知自利寧肯為國王
家地也王泣謝曰臣老耄聽信險邪以

致此今聞命願奉表自雪且請前王還
國其小人黨與悉聽使臣治於是執宋
璘囚征東省數其罪因謂王曰人有疾
得醫必愈今我之來誠王之良醫也○
遣齊安公淑上表請還前王○囚內僚
宋均于巡軍已而王釋之初王以洪子
藩言表請前王前密直宋邦英前承旨
宋璘等惡前王說王作畏吾字書獻于
帝沮之遂以金寶印白紙十二幅授均
入京師凡可以沮毀前王者隨宜作書

獻于帝會帝不允入朝之請均不得施
其計藏其紙于宦者福壽家入還後郎
將李承雨賈其紙東還塔察兒歸遇諸
道取見附承雨二幅曰汝歸示爾國宰
相以其餘幅上中書省承雨還國告宰
樞白王囚均王命釋之宰樞不肯使衛
士招均至宮門釋之已而元遣兵部尚
書伯伯劉學士來以帝命問王曰有以
畏吾文字請沮前王乎曰不知宋邦英
宋璘等入說王使承旨金自興持畏吾

文字草本以示使臣曰我倉卒承問輒以不知對既還得此書於箱篋但忘之耳伯伯怒辭王請宴乃與王勸邦英等于行省王出言若將救之者伯伯曰有臣如此不治其奸後將益甚邦英被縛乃服於是押送邦英等于元時帝寢疾政在中宮邦英宋璘等賞緣左右面免而還王各賜衣○貧成事安裕建議置國學贍學錢○初王聽元耶律希逸之勸重新文廟至是告成王詣國學謁先

聖七館諸生迎謁於道獻歌謠王命密
直使李混作入學頌林元作愛日箴以
示諸生○元杖流吳祈石天補兄弟于
安西

甲辰

乙巳

○召僧紹瓊于宮中○王與淑昌院妃
受菩薩戒中貧韓希愈承旨崔崇曰秘
記云國君敬南僧必致覆亡之禍願殿
下慎之不聽○王如元韓希愈王惟紹
等二十九人從行○前王恐王宋之徒

從至京師恣其兇謀乃請於丞相答刺罕使洪子藩崔有滄柳庇金深金延壽等五人亦從行

丙午

○僉議中贊致仕安裕卒○王在前王

邨左右聲言王欲與前王俱東還王惟

紹宋邦英韓慎宋璘等與其黨宋均謀

曰王仆地折齒勸王私舍於寶塔公主

之所自得幸計曰乳母及寵宦者諧前

王於皇后又諧於左丞相阿忽台平章

八道馬辛曰前王素失子道不諧公主

故王嫉之欲以端興侯璵為侯者非一日矣為前王計誠宜改過自新以供子職而我王舍其邨又不勤侍奉至使仆地折齒我王雖欲勿怒得乎前王夙願為僧而省官不聽今若祝髮令璵繼尚公主則前王之願遂而我王之志得矣阿忽台八道馬辛皆許之公主素不謹行見璵貌美遂屬意於璵惟紹等見左丞相塔剌罕又譖前王如告阿忽台塔剌罕曰益知禮普化王世祖之甥也寶

塔公主亦宗室之女也改嫁廢適於理
安乎惟紹等之謀既洩洪子藩等五人
詣中書言惟紹等離間王父子逆理亂
常罪莫甚焉省官遂囚惟紹等四人總
而後臣高世金文衍等七十人上書中
書省極論惟紹等罪狀且請奉王而還
省官奏之以促行王無以為計乃飲藥
發痢疾自夏至秋不起公主聞惟紹被
訴怒甚杖文衍使人守戶禁其出入王
所於是諸從臣皆離散惟秘書丞李兆

年內堅崔晉侍

丁未春正月帝崩右丞相哈剌哈孫遣使迎懷
寧王海山于漠北及其弟愛育黎拔力八
達於懷州二月愛育黎拔力八達至自懷
州誅阿忽台等執阿難合歸於上都夏五
月懷寧王海山至上都廢皇后伯岳吾氏
居東安殺之誅安西王阿難答及諸王明
里帖木兒遂即位六月立弟愛育黎拔力
八達為皇太子

○元成宗崩前王與皇姪愛育黎拔力

八達及右丞相塔剌罕定策迎立懷寧
王海山為帝奉太子首捕王惟紹及黨
惡者遷王於慶壽寺王所任使者悉罷
之即以從臣權漢功主選法除拜所親
信者王拱手行印而已國政盡歸於前
王逮捕惟紹之黨及有宿憾者中贊宋
玠等三十六人籍其家而流之乃誅瑞
興侯璵王惟紹宋邦英韓慎宋璘崔義
崔洵等父子兄弟皆沒為奴以韓希愈
生時略無規諫寬其子儉于嘉州復其

吏役○元遣王還國○國學大司成致仕尹諧卒

戊申改元至大春正月以阿沙不花為右丞相行御史大夫事西僧歐上都留守李壁釋不問冬十月以西僧教瓦班為翰林學士承旨

○秋七月王薨於神孝寺王遺教機務委付瀋陽王○八月壬子前王自元奔喪詣殯殿入哭百官以玄冠素服侍立甲寅即位于壽靈宮是為忠宣王受羣

臣賀禮未畢天大雷電兩雹○戊寅幸
神孝寺遂幸王輪寺住持仁照進茶總
而肉膳○幸龍化池中護金深亭王○

樂浪公金瑋享王子男山書齋於是宰

樞日進膳爭極豪侈○十月葬慶陵王

襄麻經至山陵奠訖乃還釋服○王幸

許琮家納故平陽公眩妻許氏又幸金

文衍家蒸淑昌院妃監察糾正禹倬持

斧東蒿上書諫之○元遣使冊王○命

停入關會王自移御金文衍家淑妃日

夜媼媚百態王惑之不親政有是命○

王如元

已酉秋八月置太子右衛率府

○立權鹽法王欲備國用公私各置鹽
盆盡入官估價銀一斤六十四碩一兩
四碩布一匹二碩令用鹽者皆赴義倉
和買嚴私鹽盆及私貿易者又發民為
鹽戶民甚苦之歲入諸道鹽價布四萬
匹○元遣遼陽省宣撫使劉顯等來造
舟百艘皇太后欲營佛寺洪福源孫重

喜奏白頭山多美材若發瀋陽軍二千
伐之流下鴨綠江使高麗舟載以輸便
於是遣造舡輸米三千碩獎不可言西
海交州揚廣民尤受害

庚戌

○王在元欲傳位世子鑑密令人撰表
尋為從臣所沮未幾殺世子及從者

重義等○以柳清臣為金義政丞判三

司事改諸司及州郡號○以入元官者

李大順等十六人同日封君初安平公

主嘗薦數言於世祖頗得親寵至有奉

使來復其家官其族於是殘忍之徒轉
相歆慕父官其子兄官其弟又有強暴
自割者不數年刀鋸之輩甚多成宗皇
帝以來閹人用事有官至大司徒王在
京數出入三宮曰狎此輩並封君由是
選法大壞熏腐未燥者亦輕視本國○
僉議中資金之淑卒性廉潔剛正三別
抄之叛陷賊不污密以賊狀達于官軍
後賞以官闕里吉思為行省凡奴婢其
父母一良欲聽為良宰相莫有止之之

淑獨引世祖本國舊俗之詔曰此例具在不可變更闕里吉思不復言

辛亥春正月帝崩三月皇太子即位

○僉議贊成事致仕權坦率性耿介不苟合嘗有遁世之志父躋強留之仕為禮昇猛价四州副使皆廉明稱嘗按三道行文書但用鈴板未嘗發一使令行禁止酷信浮屠斷薰肉四十年自號夢庵居士既老一夕遁入禪興社剃髮子溥馳往大哭坦曰將復髮鬚我耶此予

素志也○元下制罷行省○僉議政丞
致仕李混卒性寬厚且不廉其家稍富
務為踈散喜賓客好琴瑟寧海得海
浮查製舞鼓至今傳于樂府

壬子改元皇慶春正月制進翰林國史院秩

癸丑夏六月詔以周敦頤程顥程頤張載邵雍

司馬光朱熹張栻呂祖謙許衡并從祀孔
子廟庭

○密直司事李思溫化平君金深等議
以王久留京師歲輸本國米布不可勝

記實由權漢功崔誠之掌選法利其賂
 遺朴景良為王心腹營置產業王之不
 歸實由三人具罪狀呈徽政使矢利門
 矯太后制下漢功等獄王怒曰侍婢白
 太后釋之仍杖流金深思温等于臨兆
 後帝皆召還○元欲王歸國王無以為
 辭請于帝遜位于江陵大君燾又以姪
 延安君嵩為世子欲仍留朝廷不聽遂
 與公主還稱上王王自元侍上王偕還
 六月甲申即位于延慶宮是為忠肅王

○王五日一朝上王○上王飯僧二千
燃燈二千于延慶宮五日上王嘗願飯
百八萬僧點百八萬燈至是日飯二千
僧點二千燈五日可滿僧一萬燈一萬
謂之萬僧會施佛銀瓶一百手擎香爐
伶官奏樂僧冲坦孝楨說法各施銀一
斤餘僧二千二十斤其費不可勝記

甲寅改元延祐夏六月勅自今宦者勿得授文
階冬十二月復以高履謙為國子司業

○上王流右獻納李朝隱左遷右思補

禹偁左思補尹頎時僧景麟景聰俱有
寵授大禪師諫官不署告身上王怒召
讓朝隱等猶不署欲杖之偁廷辨慷慨
王悟怒稍解然以朝隱主僧批流之餘
左遷○以洪奎為南陽府院君白頎正
僉議平理時程周之學始行中國未及
東方頎正在元得兩學之東還李齊賢
朴忠佐首先師受○上王自紀其功德
十餘條密下式目令上賤陳賀欲以聞
於上國也○上王如元王後于金郊奉

觴而進上王流涕元命上王留京師上
王構萬卷堂於燕邸召李齊賢充府中
迎致文儒閣復姚燧趙孟頫虞集等與
之後遊以考究書文自娛元以上王為
相固辭○遣博士柳衍等詣江南購書
籍舡敗衍等赤身登岸判典校洪瀾以
太子府叅軍在江南以寶鈔一百五十
錠遺衍購經籍一萬八百卷而還瀾又
奏元賜王冊書四千七十冊皆宋秘閣
所藏也

乙卯夏五月成紀縣山移

丙辰冬十月以趙孟頫為翰林學士承旨冬十二月立子碩德八剌為皇太子

○上王奏于帝傳瀋陽王位于世子曷自稱太尉王○嚴密直副使兼大司憲安于冕以元尹趙珣代之珣方寵於上王而于冕有公望無內援識者惜之○南陽府院君洪奎卒

丁巳 ○王微行幸妓萬年歡家二月改于西

海道○僉議政承閔漬撰進本朝編年

綱目上起國初下訖高宗書凡四十二
卷瀆稍有文操而心術不正不知性理
學其論昭穆以朱子議為非○設九齋
朔試時監試廢已久始以朔試代之

戊午春二月寫金字經

○春王及公主宴于延慶宮還路馬上
記姚安道所賦玄宗打球圖詩吟詠者
久之翌日召權漢功尹莘傑賦詩歡甚
又久吟打球圖詩○罷州郡事審官事
審官之說本為均平賦役表正風俗而

今及廣占公田多匿民戶擅作威福有
害無補令盡革罷未幾豪權復自為之
害甚於前置辨為都監大索豪勢所占
民田還其主中外大悅獨豪勢患之訴
上王罷之後有三百人伺王出幸訴駕
前復設尋復罷之○權漢功崔誠之等
四五輩侍上王在元用事不問賢否遙
傳王旨濫受朱紫營私病民王思欲釐
正分遣執義金千鎰持平張元組于兩
南及西北面問民疾苦嚴行點陟千鎰

懷私誣安王杖于內庭元組亦守劣獨
舉金廷義橫斂皮幣上王問之以廷義
方扈從流元組于島

已未

○上王請于帝降御香南遊浙江至寶
陀山而還

庚申春正月帝崩三月太子即位夏四月近臣

獻七寶帶

○聖文宣王像○李齊賢朴孝修堂試
取趙龍甲等三十三人○上王知時事
將變欲避患復請帝降香江南行至金

山寺帝遣使急召以騎士擁逼以北侍
 從臣僚恐王不免皆奔竄或有仰藥者
 上王還大都帝命護送本國安置王遲
 留不即發帝命祝髮以學佛經為名流
 吐蕃撒思結之地朴仁幹等十八人後
 辛酉改元至治春正月罷元夕張燈于禁中

○下權漢功金廷羨蔡洪指于獄命鞠
 之漢功自廁竇逃還捕之籍漢功洪指
 家杖流遠島時臨海君李瑱餞于郊漢
 功曰天地雖廣大一身藏處難瑱曰廁

實好漢功大漸上王之留元也漢功等
招權納賂專擅國事王頗懷不平自上
王西遷以後宦官左右謀改上王之政
放逐舊臣無虛日○王被詔入元柳清
臣吳儆元忠韓滉等從行寓伯顏禿古
思家帝命收國王印童時內豎朴仁平
以姦巧得幸與曹頤及頤養子而在帝
側用事宦者楊安吉潛結互為唇齒誘
引羣小陰附藩王遂詐以國家陰事轉
譖于帝收國王印王之侍從皆離畔時

人曰仁平人猶誤主者必此人也○同
知密直事李伯謙卒○蔡河中偕元使
來詐言帝赦權漢功蔡洪哲而召之又
言帝以濟王高為國王謂辨為都監官
曰汝從惡王命棄我父田民斷與人耶
壬戌 ○藩王高遣其臣朴龜壽寄書宰相列

數國王過失謀奪王位曹頴蔡河中四
五輩從諛而織成之於是問事使臣絡
繹達來○權漢功蔡洪哲李光達等怨
王之杖流乃邀閔漬等謀立藩王會百

官上書中書省執義尹宣佐曰臣而訴
君狗彘不為唾之而去閔宗儒金倫亦
以為非臺諫史翰皆不署名是日署書
未半天忽大雨雹已而漢功等又招百
官署名忽又雷雹使民部議郎趙湜賫
書如元呈中書省不受呈翰林院亦不
受

癸亥春正月起吳澄為翰林院直學士二月寫
金字藏經秋八月癸亥御史大夫鐵失弒
帝于南坡及右丞相拜住諸王按林不花

等奉璽綬迎晉王也孫鐵木兒于北邊九月晉王即位于龍居河冬十月鐵失也先鐵木兒等伏誅

○二月元量移上王子及朵思麻之地以李齊賢崔誠之等上書元郎中及丞相拜住也至九月元御史鐵失弒英宗皇帝晉王即帝位召還上王子于大都

經世之成二千二百七十九

甲子元泰定帝元年○高麗忠肅王十一年二月立子阿速吉八為皇太子

○元勅王還國復賜印章○曹頡蔡河中等又令留元無賴子弟二千餘人連名呈省訴王不已

乙丑

○化平府使李晟卒○夏五月王至自元○上王薨于元王煦李凌幹等奉梓宮還百官玄冠素服郊迎

丙寅

丁卯

戊辰改元致和明宗天曆元年秋七月帝崩于上都八月簽樞密院事燕帖木兒謀逆執

中書省御史臺臣烏伯都刺等下獄遂遣
 使迎懷王晉帖睦爾於江陵○皇太子阿
 速吉八即位于上都梁王王禪右丞相塔
 失帖木兒將兵分道討燕帖木兒九月晉
 帖睦爾罷帝位冬十月晉帖睦爾兵陷上
 都梁王王禪遁走遼王脫脫死之冬十一
 月遣使迎周王和世琜于漠北

○柳清臣吳潛等請中書省誣訴王旨
 辭音啞不親政事帝遣平章事買驢等
 來質問王對辨有叙禮容嚴肅買驢乃

曰帝所以命臣來者察王疾也以今所見向者之訴皆誣也前到淹留使臣並督還歸王餽金銀段布皆不受

己巳春正月周王和世球稱帝于和寧之北三月
月曷帖睦爾遣燕帖木兒奉皇帝寶赴漠北
夏四月周王遣使立曷帖睦爾為太子
秋七月太白經天八月丙戌周王次旺忽察都
曷帖睦爾入見庚寅王暴卒曷帖睦爾
嚴位于上都冬十二月以西僧贊真吃刺思為帝師

○柳清臣死于元○元遣舍人完者頌
即位詔時王病不出迎憂懼密直金之
鏡曰完者似欲官其族人之在本國者
王乃命之鏡及大司成高用賢掌銓注
內臣申時用至政房罵之鏡曰今日除
授為使臣也乃輦奚獨嚮官而不官吾
子孫耶又顧在廷喪職者曰若等無錢
又誰怨耶求官者雲集之鏡等夜匿村
舍注擬批既成密直李仁吉擅改于其
第及批目下用事者爭相塗抹竄改朱

黑不可辨時人謂之黑冊政事

庚午改元至順春二月立明宗子懿璘質班為

鄴王

○元冊世子禎為國王是為忠惠王○

遂遣七十賢來取國王印王委機務於

嬖臣裴佺等日與內賢為角力戲起居

注李堪白王曰君舉不可不慎左右書

之王曰書者誰歟湛曰史臣之職也王

曰書我過失者皆書生也由是益惡儒

○置知印房以右尹尹之賢起居注李

湛正郎李君佺典籤金漢龍充之○王
尚關西王雋八女○上王將如元至黃
州王道上胡跪迎謁上王曰汝之父母
皆高麗也何見我胡禮乎訓戒嚴厲涕
泣而出○秋八月王至自元即位○始
令舉子誦律詩四韻一百首通小學五
姓字韻乃許赴試

辛未秋八月詔皇子古剌荅納出居燕帖木兒
家更名燕帖古思

○王改于江陵又改于海州自是每月

遊畋觀水戲擊球

壬申秋八月帝崩于上都冬十月酈王懿璘質
班即位十一月酈王薨

○春正月上王在元○上王復位元遣
郎中蔣伯祥等來傳帝命已於正月三
日命上王復位王及左右皆失色伯祥
收國璽封庫王遂如元○王遣閔祥正
趙炎輝下政丞尹碩宰相孫琦金之鏡
上護軍裴佺等十三人于獄伯祥又囚
權適尹佺等十五人杖流金天祐李君

佞等十餘人等于海島已而元遣太史
都赤來囚蔣伯祥閔祥正趙炎輝于行
省釋尹碩等召還孫琦等二十餘人時
伯祥多作威福贖于賄賂國人怨之百
官書訴伯祥于都赤都赤執伯祥以歸
○行邸用不足科斂百官布貨抽索富
人財

癸酉改元元統夏六月安權帖睦爾即位于上
都以伯顏為太師右丞相撒敦為太傅左
丞相

○元丞相燕帖木兒奏皇太后督王還國王與公主東還

甲戌春正月汴梁兩月三月天雨毛

乙亥改元至元夏六月唐其勢反伏誅秋七月

伯顏弑皇后伯牙吳氏冬十一月詔罷科

舉

○王履幸海州○命祐文君梁將前郎

將曹莘卿掌銓注以姜融僉議左丞相

蔡河中僉議贊成事崔老星為懷義君

申時用為大匡元尹尹賢為持平

續世書補錄卷之五

三十一

丙子 ○王如元

丁丑冬十月金華處士許謙卒

戊寅

己卯 ○春三月王薨○前王滂其舅洪戎繼

室黃氏又烝庶母壽妃強烝慶華公主

○曹頤反舉兵圍王宮兵敗伏誅頤與

洪彬及省官等聲言逐去羣臣而陰為

潘王地取國印置永安宮乃曰我為政

丞見王荒淫無道若不聞于朝廷罪在

我身遂與洪彬申伯等十餘人點軍千

餘剪紅綃貼衣為識夜五鼓罷王宮射
中王臂頓兵為王先鋒所敗追射頓而
殺之尸于巡軍南橋下其黨巡軍一府
皆欲嚴治金倫獨曰此輩誑誤於頓指
嗾何足責哉乃弛其刑諸囚感悅首服
無憾○元遣斷事官頭麟授國王印俄
兩執王及洪彬等十二人以歸蓋曰頓
黨之訴也

庚辰春二月伯顏有罪黜為河南行省左丞相
尋竄南隱州道死夏六月詔廢文宗廟主

遷太皇太后弘吉刺氏于東安州尋崩放
燕帖古思于高麗殺諸道冬十月以脫脫
為右丞相鐵木兒不花為左丞相

○元囚王子刑部又斃金倫韓宗愈等
十餘人于獄使五府官雜問之脫脫奏
帝釋王復位還國○政堂文學星山尹
李兆年見王失德屢切諫不聽即謝病
乞退匹馬還鄉終身不出

辛巳改元至正

壬午春正月開金河口

癸未春三月詔修遼金宋三史冬十二月徵江
陵處士杜本不至

○罷習射場屬東西大悲院僧翬仙勸
王創院城外聚城中病人救藥贍衣食
王問翬仙長生訣對曰人有定分無過
本之理但不可為惡以促之○初徵職
稅王聽嬖人甯夫金之言以為有職居
外者退閑病民徵職稅利國用代言閔
澳贊成之分遣人諸道徵布人聞令下
或挈家登山或乘舟遠遁焚山澤而索

之禍及於族○又徵艇稅無舟者亦被
其害王淫縱無道至於商賈計利分折
絲毫奪人田民盡屬寶興庫舉國騷擾
○起新宮于三峴王躬督其役謂近臣
曰今宮闕將成欲實以奴婢卿等各獻
有姿色一兩婢如何皆曰唯命責監役
官營構不亟若不斷手於十月必致重
刑又懸榜曰宰相以下輸財不及期者
徵布五百匹分配海島於是晝夜董役
輦材絡繹殿宇門戶皆飾鑄銅又斂諸

道銅鐵鑄鼎鑊錡釜納之新宮民間農
器括盡無餘○評理致仕尹宣佐卒生
而穎異七歲能屬文忠烈朝擢魁科初
授正言忠肅入元權漢切請立藩王之
日一言折之終始不貳年七十九卒○
冬十一月元遣乃住朵赤等詐索鞍輪
且頒赦詔王率百官郊迎聽詔就縛
之使者皆拔劍執侍從羣小百官皆走
匿郎中金永煦等中掣亦有被殺者辛
裔伏劍御外以助之朵赤等亦掖王載

以一匹馳去○元以檻車流王于揭陽
縣去燕京二萬餘里無一人從行

甲申

○春正月王薨于岳陽縣國人聞之莫

有悲之者○二月元命元子昕嗣位是

為忠穆王時年八歲在元帝問曰汝學

父乎學母乎對曰願學母帝嘆其聰惠

以蔡河中為右丞相韓宗愈左丞相李

齊賢判三司事金倫權謙朴忠佐為贊

成事○四月王至自元○改定科舉法

○僉議僉理羅益禧卒○罷政房歸之

典理軍簿

乙酉秋九月遣使巡行天下

○瀋王暠卒○罷王煦以金永煦為右
政丞煦為姦貪所惡而罷時人缺望

丙戌

○以閔漬所撰編年綱目多闕漏命李
齊賢安軸李穀安震李仁復等更撰進

丁亥冬十月沿江兵起十一月詔選臺名臣出
為守令

戊子秋八月奎章閣侍書學士致仕虞集卒冬
十一月台州方國瑄兵起

○十二月王薨時辛裔田淑蒙相繼用
事親如故舊布例卿相代言鄭思度依
阿進用久在政房中外輻輳時人目裔
曰辛王且母妃盛年居中康允忠裴佺
出入得幸秉政權作威福三煦金永晫
奉帝命欲整理舊弊卒為允忠等所陷
已丑夏四月襄陽童子暴長

○春二月元命忠惠王子暉入朝○夏
五月元命暉嗣王位是為忠定王○王
命鐵城君李君佺攝國務流前密直金

敬直貶前客直李承老為宣州勾當前
代言尹澤為光陽監務○秋王自元至
即位大風雨屋瓦盡飛儀鳳樓頽松岳
龍首兩山松盡拔○咸陽府院君朴忠
佐卒

庚寅

○倭寇固城竹林巨濟等處合州千戶
崔禪等擊却之倭寇之興始此○崔瀉
與其弟崔源等叛奔北元

辛卯夏四月詔修河防左遷工部尚書成遵為
河間鹽運使以賈魯駘治河防使五月頴

州劉福通蕭縣李二羅田徐壽輝等兵起
冬十月徐壽輝稱帝于蘄水

○冬十月元以江陵大石棋為王是為
恭愍王更名顓○王遣使封倉庫收國
璽以歸王遜于江華○德興君塔思帖
木兒奔于元○王命李齊賢貶出權宰
襄陰朴守明盧英瑞尹時遇鄭大起等
措置得宜人賴以安○十二月王至自
元即位

壬辰秋八月右丞相脫脫將諸軍擊李二于徐

州大敗之屠其城

○賜金羅道萬戶崔濯教言衣酒勞之
濯持軍嚴正不擾州縣與士卒同甘苦
倭寇萬德社濯以輕騎追捕終濯在鎮
寇不復犯○王辨髮監察大夫李衍宗
諫曰辨髮胡服非先王之制願勿效王
悅即解辨賜衍宗衣褥○罷政房歸銓
注於典理軍簿○宥裴佷召典法掖郎
鄭云敬佐郎徐浩于內殿賜酒尚書玄
慶進諫曰寢殿至嚴今外人出入無制

卷之六

三十一

且掌刑之官不可昵近今云敬浩賜酒
 寢殿皆有違法王然之○前王過燒
 于江華王之遜江華也與校令申德麟
 等四五輩從行追擊巡軍准朴思慎韓
 備從之供膳不克憂愁號泣及訃至都
 人莫不流涕○內府小尹金暉南樂倭
 于索梁獲倭船一艘倭船大至暉南兵
 小不能敵退次西江調發諸領兵婦女
 欄街痛哭倭焚喬桐甲山倉○羅執義
 金斗持平朴思守掌令慶千與初監

大夫李衍宗姦巧善揣摩慶言時事趙
日信恃功專恣衍宗置不劾是日玘等
以衍宗附日新不與議而劾日新日新
請與臺臣廷辨王命衍宗與李公遂聽
兩造衍宗手執彈章條問之玘曰公憲
司既不彈舉罪人反問我輩耶衍宗慙
恚玘又囚日新家奴日新破獄出之反
訴臺官命玘等勿仕衍宗承命坐臺遂
刻玘等王嘗夜召李齊賢咨訪國事曰
語曰衍宗多詐人也○李衍宗棄官歸

初衍宗附日新得是職及日新見劾恐禍及已潛歸田里○罷右副代言金得培左副代言柳淑先是元丞相脫脫遣使以書報王勿用儉人趙日新崔德林要其使者云淑與得培居中用事使者白王罷之○王召僧普虛入內問法○吉昌府院君權準卒忠肅王與潘王相持羣不逞多附潘王準守義不戀會頓之亂閉門不出性純重實言笑儀表秀偉然依勢致富識者譏之○印承旦入

待書廷請罷辦正都監王不應但曰穿
窬夜行惡月之明他日金永煦又請罷
王曰予欲聞嘉言設書廷卿等所言實
乖予心遂稱疾入內○趙日新作亂犯
行宮殺宿衛臣僚王命金添壽討誅之
○以李齊賢為右政丞曹益清左政丞
○流金鑄于海島

癸巳夏五月秦州張士誠兵起據高郵自稱誠
王○六月立愛猷識理達臘為皇太子○
冬十二月江浙平章政事卜顏帖木兒會

兵擊徐壽輝于蕪水破之

○李穡擢元朝制科第二甲第二名勅授應奉翰林文字承仕同知判制誥兼國史編修官

經世之亥二千二百八十

甲午元順帝二十二年○高麗恭愍王三年冬十二月帝製龍舟于內苑

○夏倭掠全羅道漕舡四十餘艘○元丞相脫脫以帝命遣使來召柳渥廉梯臣權謙金鏞鄭世雲李權黃裳崔瑩李

芳實安祐等四十餘人及水軍三百期
以八月十五日集燕京討張士誠秋七
月柳濯等領兵三千赴征王親點送之
是役也脫脫攻高郵城柳濯等赴征將
士及國人在燕京者搃二萬三千人為
前鋒城將陷韃靼知院老長忌我國人
專功令曰今日暮明日乃取麾軍而退
是夜賊堅壁設備明日攻之不克會脫
脫被諸流淮安自是南賊日益我軍陷
六合城又移防淮安路李權等六人戰

死崔瑩力戰身被數鎗

乙未春二月劉福通以韓林兒稱宋帝夏六月
太祖高皇帝起兵和州渡江而取大平路

○全羅道按廉鄭之祥囚元御者使桎
思不花于全州王命下之祥獄不花本
國人也入元有寵兄弟臣桂應呂皆無
仕擅作威福國人畏之至是不花降香
諸道所至縱暴之祥迎候恭謹不花聽
接伴使洪元摺譖縛辱之祥即憤恚大
叫邑吏呼噪而入解縛扶出之祥即率

衆執不花元哲等囚之馳還京道過公
州執其弟應呂以鐵椎搗之數日而死
之祥來白王王驚駭下巡軍命捕全州
牧使崔英起及邑吏等元遣買住來鞠
之祥降全州為部曲○倭掠全羅道漕
舡二百艘

丙申春三月太祖帥師克金陵改集慶路為應
天府

○三月日無光中有黑子者連日○奇
轍權謙盧頊謀叛伏誅○罷征東行省

理問所復舊官制○命印璫姜仲卿在

瑩柳仁雨等討鴨江以西雙城以北○

雙城人趙小生千戶卓都卿等召趙曠

舉兵為拒守計仁雨乃以蠟書遺曠曠

誘小生謀生趙都赤都赤遂來附於是

仁雨與趙都赤都赤復和登

定長預高文宜州及宣德元興寧仁輝

德靜邊等鎮小生逃入伊板嶺北之石

之地仁雨貪財嗜殺王見都赤來為辛

戶仁雨忌而殺之北人歸附之心遂沮

○傳至正年彌

丁丑夏五月元以搠思監為右丞相秋九月天完將陳友諒殺倪文俊冬十二月天完將明珍據成都

○下蔡河中獄自殺初河中流順天僧達禪來自河中訪金贊曰蔡相欲與公謀大事語泄繫禪巡軍贊逃逮捕河中命李仁復鞫之拷掠累旬河中誣服自縊斬于市○司天小監于必興上書言玉龍記云我國始于白頭終于智異其勢水根木幹

之地以黑為父母以青為身若風俗順土則昌逆土則灾風俗者君臣也百姓衣服冠蓋樂調禮器什用是也今後文武百官黑衣青笠僧服黑巾大冠女服黑羅又於諸山栽松茂密凡器用鑰銅瓦器以順風上從之○復歸銓選於吏兵部

戊戌冬十一月元左丞相搠思監有罪免以紐的諺為右丞相

○以大將軍崔瑩為揚廣金羅道體覆使仍命不能禦倭者悉以軍法論時倭

冠無處不發○方國珍遣人來獻方物

○倭焚喬桐京城戒嚴發丁坊里為軍

○秋七月江浙行省丞相張士誠遣使

致書來獻沉香山水晶山玉帶彩段等

物

己亥春三月元方國珍遣使以温台慶元三郡

附於 太祖冬十二月天完將陳友諒徙

其主徐壽輝都江州自稱漢王

○東北面兵馬使鄭暉獻海青王曰軍

事方興宜崇儉約安用珍禽放之○遼

潘流民二千三百餘戶來投分處東西
郡縣官給資糧先是本國人亦有渡江
居者兵亂皆自還○十二月紅頭賊魁
偽平章毛居敬等衆號四萬米渡鴨綠
江陷義州殺副使宋永世州民千餘人
連陷靜州麟州以李崑爲西北面都元
帥慶千興副元帥金得培都指揮使以
禦之李崑懦不能禦軍遣平章事李承
慶代之

庚子春三月元復以搠思監爲右丞相

○三月慶千與等諸將破賊班師○紅
賊七十艘泊西海道豐州又百餘艘入
安岳郡掠錢穀燒廬舍又侵黃州安州
遣李芳實擊賊于豐州賊乘船遁去王
賜芳實玉帶三纓以褒之大饗壯征將
士○是年自二月至四月旱甚王為之
日一食○五月倭寇全羅道會尾次濤
又寇楊廣道平澤牙州新平龍城等十
餘城京城戒嚴以柳濯為京畿兵馬都
統使李春富及我 桓祖分為京東平江

六馬使發丁防異為軍又令百官助戰
諫官詣宮門拜辭參政鄭世雲曰諫官
從軍古所未聞如國體何王特免之因
學博士等上言臣等侍於夫子廟庭學
官從軍古無其例侍中廣寧臣李鼎皆
曰爾雖不侍孔子孔子為逃秦書金希
祖爭之不得彥陽伯金敬直詣闕問宰
樞博奕戲謹還家嘆息曰國家其將以
乎宰相雖在太平之世尚不可能感况
今干戈搶攘飢饉荐臻不此之恤而耽

庚子年

遷都漢

陽今十二月

而還

樂若是欲不亡得乎○閏月倭寇江華

殺三百餘人掠米四萬碩○京城飢大

布一匹直米五升王發廩二千碩令民

納大布一匹授米一斗○秋七月王幸

白岳相遷都之地○遣益山君李公遂

戶部尚書朱思忠如元至湯站道授還

渡鴨江王大怒固遣之至瀋陽數月竟

不達○冬十一月移御白嶽新宮留四

箇月而還

辛丑秋八月大明太祖帥師拔江州漢王友諒

走武昌

○王邀僧普印于內殿日講傳燈錄○
十月紅頭賊偽平章潘誠沙劉闢先生
朱元帥等十餘萬衆渡鴨綠江寇朔州
以李芳實爲西北面都指揮使遣李慶
餘柵岳嶺以安祐爲上元帥金得培都
兵馬使鄭暉都指揮使鄭世雲西北面
軍容體覆使是役也我 太祖斬賊王
元帥以下百餘級擒一人以獻十一月
賊攻破岳嶺柵我軍大潰賊乘勝先鋒

至興義驛王知事急奉太后南幸○十
二月壬辰至福州○王幸映湖樓乘舟
遊賞觀者如堵有反袂與嗟者○監州
人中郎將金長壽倡率州人發兵殺賊
遊騎百四十餘人○賊三百餘騎自原
州牧使宋光彥死之○江華府詔降賊
賊伏兵盡殺賊賊不敢入境

壬寅春三月明王孫破雲南夏五月自稱隴蜀

王

○春正月撫兵官鄭世雲都元帥安祐

副元帥金得培李芳實等大敗紅賊復

京城○金鑄鑄首令安祐殺鄭世璠○

王自福州幸尚州金鑄殺元帥安祐李

芳實金得培陞福州牧為安東大都護

府安城縣為郡降水原府為郡王之駐

福也福人盡心供頓徵兵諸道收復京

城紅賊之招降楊廣也水原最先下州

郡莫敢挫其鋒安城獨以小邑設計箴

賊賊不敢南下割水原四部曲以隸之

○秋七月趙小生誘引約哈出入寇三

撒等地以我 太祖爲東北面兵馬使
以禦之遇賊德山洞擊走之又戰於韃
靺洞大敗之 八月乙酉王發尚州壬
辰至青州 置祿轉色 冬十月地震
監察大夫金續命獻納黃瑾等上書曰
地者臣道也今賞罰不明而大小之臣
怠弛曠官又因軍興白丁驟拜卿相皂
隸濫處朝班臣道淆亂以致地震請自
今信賞必罰重惜名號殿下日與刑餘
陰類相狎樂聞鄙俚無稽之言夜分不

寢踈遠大臣嘉謀讜議無時而入自今
三殿宦者各留十人餘悉汰去治國之
道專在經史未聞以佛書致治者也殷
下過信佛法群髡緣此干謁濟私自今
願斷緇流出入禁闈復開經筵日訪治
道女謁爲政之大害也今針線娘子亦
有封翁主宅主者僭擬踰分除宗室勳
舊外勿許封爵守令保舉皆徇面情其
所薦舉至有不識字者自今臨軒引見
核其名實非其人舉主必罰王召臺諫

詰之臺諫面爭益功王怒甚柳湫進曰
既求直言而怒言者可乎王怒小解

癸卯春二月張士誠將呂珍入安豐殺宋劉福
通等據其城 太祖率兵擊走之秋七月
漢主友諒圍洪都 太祖帥諸將討之大
戰于鄱陽湖友諒敗死子理立九月張士
誠自稱吳王

二月乙亥王發清州癸未次興王寺
金鏞反遣其黨犯行宮王命流金鏞
已而鏞伏誅 四月倭艇二百十三艘

泊喬洞京城戒嚴以安遇慶為防禦使
⊗廉悌臣罷以柳濯為右丞相李公遂
為左政丞⊗太白晝見經天二日⊗王
聞崔濡奏德興君發遼陽省兵以來與
宰樞議防禦之策以慶千興為西北面
都元帥與安祐慶李龜李珣及兵馬使
巡撫使等分屯諸州皆受都元帥節度
以禦之⊗元遣李家奴詔收王印章時
有宰相勸王南巡避德興之亂王然之
吳仁澤曰德興非紅賊比大駕一南都

城以址誰從殿下者今日之策親征為
上議遂寢

甲辰春正月 太祖建國號曰吳二月自將代
漢漢主陳理降湖廣江西悉平三月元削
孛羅帖木兒官爵不受命詔擴廓帖木兒
討之夏四月孛羅帖木兒舉兵犯關殺右
丞相搠思監太子出奔

●崔瑩等諸將擊破崔濡軍濡軍渡江
而走還燕京者纔十七騎時赴征軍卒
經年暴露糧餉又絕凍餒顛仆斗米換

馬道瑾相繼及破兵生還者百纔一二
而用事之臣壅蔽不聞軍中虛實王竟
不知之⊗女真三善三介等入寇陷咸
州和州⊗二人誘致女真寇忽面三撒
王命交州兵馬使成士遠東北面指揮
使韓方信等往擊之皆潰和州以城皆
沒焉時 太祖往擊崔濡自西北面引
軍至鐵關與韓方信等三面進攻大敗
之悉復和咸等州三善三介奔女真終
不返⊗冬十月元遣翰林學士竒田龍

詔王復位執送崔濡誅之

乙巳春三月元太子發兵討李羅帖木兒幽二
皇后奇氏調兵拒戰大敗秋七月元李羅
帖木兒老的沙禿堅帖木兒等伏誅

○公主難產薨王慟甚手寫真日夜對
食悲泣三年不御肉膳○倭寇喬桐江
華入昌陵取世祖真以歸○以妖僧遍
照為師傅是為辛旽貶崔瑩流李龜壽
等十餘人罷柳淑李達衷皆旽諂也李
存吾鄭樞上疏論辛旽皆貶黜○廢知

榮州事鄭習仁爲庶人初習仁視事吏以故事請詣涓灾圖焚香習仁曰人臣不陷非義灾何由生若其無安順受而已命吏撤去州有佛塔名無信習仁曰異哉惡木不息盜泉不飲惡其名也烏有巍然其形爲一邑所瞻視而以無信表之者乎仍命州吏刻日夷之毗聞而怒令繫鷄林府獄移繫典獄必欲置死地廷臣多爲王白者乃得免廢爲庶人令就州復構其塔天起魯國公主影

殿于王輪寺○東民有兄弟偕行弟得黃金二錠以其一與兄至陽川江同舟而濟弟忽投金於水兄怪問之曰吾平日愛兄甚篤今以分金忽萌忌兄之心此乃不祥之物也不若投諸江忘之兄曰汝言誠是亦投金於水

丙午

丁未秋七月 太祖兵克平江執吳王張士誠以歸冬十一月 太祖兵討方國珍降之太祖兵徇山東郡縣皆下之徐達常遇春

會諸將等臨濟進克元都元主集三宮后
妃皇太子避兵杜行元亾元帝駐應昌二
年殂太祖以帝知順天命退避而去特
加號曰順帝而封其孫買的里八剌爲崇
禮侯

○知都僉議吳仁澤與前侍中慶千興
等八九人密議曰辛毗邪佞陰狡斥逐
勲舊殺戮無辜黨與日盛道誣記有
非僧非俗政亂亡國之語必是此人宜
白玉早除之判書辛貴聞之以告朕毗

八言于王捕繫仁澤等並杖流沒爲官
奴籍其家○鷄林府院君李齊賢卒
戊申大明太祖洪武元年

○春正月日本遣梵盪等來王惠倭寇
侵擾遣金逸請禁故報聘辛毗不爲禮
館待甚薄倭使怒而去○夏六月移營
影殿于馬巖待中柳濯與密直鄭思道
極諫王大怒下濯思道獄○冬十月遣
文天式如元天式至遼陽道梗而還杖
復遣之

已酉 ○夏四月 太祖高皇帝遣符寶郎僕

斯賜玉璽書報定天下王率百官出迎
于崇仁門外其書曰大明皇帝致書高
麗國王自有宋失馭天絕其祀元非我
類天命入主中國百有餘年天厭其昏
淫亦用隕絕其命華夷擾亂十有八年
當群雄初起時朕為淮右布衣忽暴兵
疾至誤入其中見其無成憂懼不寧荷
天之靈授以文武東渡江右習養民之
道十有四年西平漢王陳友諒東縛吳

王於姑蘇南平閩越戡定八番吐逐胡
君肅清華夏復我中國之舊疆今年正
月臣民推戴即皇帝位定有天下之號
曰大明建元弘武惟四夷未報故修書
遣使涉海洋入高麗報王知之俾斯以
二羊享王及斯還王餽鞍馬衣服不受
○停至正年號○遣禮部尚書洪尚載
上護軍李夏生奉表如大明賀登極○
改官制

庚戌

○復修王輪影殿○成准得還自京師

帝賜璽書訓誡為國保邦之道賜王冠服樂器書籍王妃冠服及陪臣冠服大統曆又遣使頒科舉詔○秋七月始行洪武年號○帝遣中書省宣史孟原哲來詔曰朕本農家樂生於有元之世何庚申之君荒淫昏弱紀綱大壞由是豪傑並起海內瓜分雖元兵轉戰華夏終不能治此天意也然倡亂之徒首禍天下謀奪疆土欲為王霸觀其所行未合於禮故皆滅亡此亦天意也朕當是時

年二十有四擾攘之秋盤桓避亂終不
寧居遂乃托身行伍驅馳三年覩群雄
無成徒擾生民朕乃率衆渡江訓將鍊
兵奉天征討于今十有六年削平強暴
混一天下大統既正民庶皆安今年六
月十日左副將軍李文忠副將軍趙庸
等遣使來奏五月十六日率兵赴至沙
漠於應昌府獲元君之孫買的里八剌
及其后妃并寶冊等物知庚申之君已
於四月二十八日自痢疾歿於應昌大

軍所至俘獲無遺中書上言宜將其孫
及其后妃并冊寶獻俘于太廟朕心恩
之深有不忍其君之亡係于天運所遺
幼孫若行獻俘加殃其身朕所不為也
况朕本元民天下之亂實非朕始今定
四海休息吾民於田里非朕所能亦天
運所致也尚慮臣民未知朕意是用播
告天下○八月司憲府請易服色○命
我太祖及西北面上元帥池龍壽副
元帥楊白淵等往擊東寧府拔之初奇

齊巨能木兒仕元為平章元亡與分司
遼潘金伯顏招集亡元遺衆割據東寧
憾其父報之誅寇我吐部王命擊之虜
奇賽金伯顏以歸誅之○以元樞密副
使濟在判司農寺事賜姓名韓復

辛亥

○倭入海州火官廨寇禮城江焚兵舡

四十艘○辛毗謀叛伏誅○殺前侍中

柳灌太后請宥不從國人有涕泣者灌
高興入清臣之孫有膽氣善武藝早以
門蔭拜監門衛大護軍不數年封君拜

相至是憲府論罪奏劾乞置典刑王遂
命繼殺之時議以為王嘗憾灌請止影
殿之役也

壬子

○倭寇白州連寇順天長興耽津道

江陵盈德德原等州縣○改官制○倭

寇安邊咸州北青萬戶趙仁慶伏兵大

破之斬首七十餘級○倭艇二十七艘

入陽川諸將領兵出戰大敗王以各司

成爲安馬及五部坊里八分設五軍護

率出昇平遂次龍泉寺閱兵中郎將李

禧鄭准提上平寇策王太悅以禧為揚
廣道安撫使准提為全羅道安撫使兼
捕倭萬戶時准提與禧再三上疏凡數十
條其略以為深陸之民不開舟楫難
以禦倭但簽生長海島及自募水戰者
令臣等將之期以五年可清海道若都
巡問使則徒費軍餉擾民生乞罷之准
提改名地

癸丑

○改年尼奴名曰禍封江寧府院八君
政堂文學白文寶傳之○法師範鄭涉

周還自京師至海中舡敗師範滄死○
帝命本國三年一聘或欲世見亦可○
遣周英資禹仁烈如京師資正金潛宋
文中曹信應舉至茲隱魯舡破英資潛
信溺死仁烈文中得還

甲寅

○遣崔瑩討濟州平之先是韓邦彥至

濟州哈赤石送里等曰吾等何敢以元

世祖放畜之馬獻諸大明只送馬三百

匹大明使林密等白王曰濟州馬不滿

二千數則帝必戮吾輩於是命瑩以

戰艦三百十四艘銳卒二萬五千六百往
討平之○追贈故宮人韓氏祖考以王
稱禍韓氏出也○秋九月宦者崔萬生
幸臣洪倫等弑王禍立是為辛禍年十
歲崔萬生洪倫等伏誅○追謚韓氏為
順靖王后○遣密直使張子溫與工判
書閔伯宣如京師告計請謚承襲○遣
密直金潛如北元告喪○同知密直使
金義殺大明使蔡斌于開州站執林密以
馬二百匹奔北元初 帝遣禮部主事

林密堊牧使蔡斌令進羅馬二千匹只
得三百匹王命人義護送遼東家等所
至遲留斌酌酒欲殺義義殺斌執密以
馬奔元子温伯營逃還義本胡人也

乙卯

○春正月遣判宗簿事崔源如京師告
喪請謚及承罷自玄陵被弑金義殺使
國人恟惧未敢通使大明大司成鄭夢
周與校令朴尚衷等陳大義以謂邇來
變故當早詳奏於是遣崔源○侍中李
仁任與百官連名為書將呈北元中書

省左代言林樸與校令朴尚哀典議副
令鄭道傳以死王決策事南今不當事
北不署名○擢安東府使李寶林為天
司憲○北元遣使來李仁任池翁欲迎
之金九容李崇仁鄭道傳權近等上書
都堂曰若迎元使一國臣民皆陷於亂
賊之罪他日何面目見玄陵於地下仁
任慶千興不受其書令道傳迎元使道
傳詣復興第曰我當斬使首而來不爾
則縛送于明辭頗不遜仁任等怒乃流

道傳于會澤繼而鄭夢周朴尚衷等上
疏極論獻納李詹正言金伯英等亦上
疏皆流貶○以河允源為大司憲允源
書知非誤斷皇天降罰八字於柱每赴
臺必先掛壁○改定都城五部戶數允
屋間架二十以上為一戶出軍丁間架
小則或并四五家為一戶

丙辰

○倭寇公州古阜泰山興德保安仁義
金堤長城等縣又陷全州○以池翁為
門下贊成事尹邦彦密直提學鄭亨生

大司憲是日除官宰樞至五十九人自
仁任齋而下各植其黨臺諫將師守令
皆出其門市井工匠貨緣除拜時人謂
之炆戶政○流三司右使金續命于文
義縣續命清直敢言人皆畏憚嘗移病
在弟慶復興李仁任池齋問疾續命曰
古制兩府省五樞七令一日所除宰樞
至五十人如物議何今之宰樞竊祿尸
位而心不正無我若也仁任曰公心不
正誰為正乎續命曰予伴食都堂凡署

事心非口是心不正孰如我乎復與等
皆默然池李深啣之陰謀傾軋至是疾
司議許時金濤劾曰近集議與國寺續
命發口不可道之言不敬孰甚請鞠治
再疏流之○倭焚合浦營屠燒架蔚義
昌會原咸安鎮海固城東平班城東矣
機張等州縣先是元帥金偵大集一道
倡妓有姿色者與麾下晝夜酣飲軍中
號曰燒酒徒以偵嗜燒酒也卒伍櫛櫛
有犯必箠一軍憤怒及寇至軍士却立

不戰曰元師使燒酒徒擊賊我輩何為
以故大敗廢偵為民流嘉德島

丁巳

○北元遣翰林承旨孛羅的冊禡○始
行北元宣光年號○李仁任白禡誅池
齋金克升等齋與仁任有隙積不平會
齋客金克升華之元李悅金承得結朋
黨自謂池門四傑議仁任厚接北使傳
洪武年號之非仁任聞之以為誹謗朝
政鞠流悅之元承得又喚臺諫劾克升
於是克承陰與齋謀去仁任仁任知其

狀與慶復與白褐誅齋及允升益謙遣
人殺之元悅承得于配所齋起行伍至
宰輔通禍乳媪賣緣有寵貪淫譖詐賣
官鬻獄及誅人皆快之○倭寇夜入塞
梁焚戰艦五十餘艘死者千餘人萬戶
孫光裕中流矢京城大震倭又寇江華
○慶尚道倭寇大熾元帥禹仁烈報繼
至我 太祖承命往擊并日而行與賊
戰于智異山下相去二百餘步有一賊
背立俯身手扣其髻示無畏 太祖用

片箭射之一矢而倒賊驚懼氣奪即大
敗之餘賊狼狽登山臨絕崖露刃垂槩
軍不得上 太祖策馬先登軍士隨之
賊墜崖死者大半遂奮擊殲之○倭自
江華改陷楊廣道充斥內地州郡蕭然
無復人烟禍欲遷都鐵原以避崔瑩以
爲不可遂寢○倭寇西海道信州文化
安岳鳳州海州我 太祖與諸元帥擊
賊于海州大破之○遣鄭夢周報聘于
日本且請禁賊○始置火燭都監

戊午

○鄭夢周還自日本○復行洪武年號

己未

○殺贊成事楊伯淵洪仲宣于流所又

殺前提學金濤等七人杖流成石璘柳

曼殊等四人仲宣與李仁任林堅味等

同在政房有隙諫官徐鈞衡等希仁任

意劾奏仲宣在先王朝潛懷異志罷歸

宜寧伯淵恃戰功頗自矯矜仁任堅味

等奏憲府劾伯淵通妻弟削職流陝州

崔瑩白禍伯淵謀害兩侍中欲自為相

請治其黨禍命瑩治之辭連仲宣仲宣

臨死仰天誓曰予若無罪天必動威及
死果大雷電以風伯淵之獄濤速繫縶
掠絕復蘇誣服殺之梟首臨死對獄官
曰我死無是惜殺一無辜反受其殃獄
官皆惕然濤門生十餘人護屍有李棕
者抱屍入川洗血解衣衣之裹以葦網
其頭懸之再拜而去時人義之○禍出
遊里巷荒于改淫于色日以為常

庚申

○以崔瑩兼海道都統使以我 太祖
為全羅慶尚都巡察使邊安烈副之倭

自鎮浦之敗攻陷郡縣三道沿海之地
蕩然一空自有倭患未有如此元帥裴
克廉鄭地等擊倭于沙斤驛敗績倭焚
雲峯縣去引月驛聲言將殺馬坵上中
外大震 太祖與安烈等引兵南下踰
雲峯至荒山西坵登鼎山峯距賊數十
里 太祖見道右險徑身先入險遇賊
五十餘射皆殪之有一賊將年纔十五
六驍勇無比舞槊馳突所向披靡稱阿
只拔都被堅甲又帶銅面無隙可射

太祖謂偏將李豆蘭曰我射堯牟頂子
落汝便射之遂躍馬射中頂子堯牟纓
絕而側急整之太祖即射之又中頂
子堯牟遂落豆蘭便射殺之於是賊挫
氣曰奮擊大破之川流盡赤獲馬一千
六百餘匹兵仗無筭零賊七十餘奔智
異山凱還崔瑩率百官班迎天壽寺門
前禡賜太祖及安烈金各五十兩諸
將銀各五十兩

辛酉 ○禡乘醉馳馬于龍首山墜馬崔瑩泣

諫曰忠惠王好色必以夜不使人見忠
肅王好遊必以時不使民怨今殿下遊
戲無度以致墜馬傷體臣等備位宰相
不能匡救何面目見人禍曰自今改之

壬戌

○胡拔都嘗擄掠東北面至是寇端州

我 太祖以都指揮使往擊大敗之

癸亥

○遣政堂文學鄭夢周賀聖節且請承

音

以運經世之十一

經元之甲一

經會之午七

經運之甲一百九十一

經世之子二千二百八十一

經世之子二千二百八十一

甲子大明太祖高皇帝洪武十七年 辛禡十

年

○代言尹就掌成均試皆取豪勢乳臭
之童時人譏之以為紅粉榜○鄭夢周
與金庾洪尚載等還自京師○鷄林君
李達衷卒達衷剛直不撓有鑑識嘗為

東土面都巡問使識 太祖於桓祖之
行回以子孫屬之恭愍朝擢為密直提
學忤辛毗罷之

乙丑

帝遣國子監學錄張溥行人段祐賜

恭愍謚又遣周倬雒英冊禡還贖以白

丙寅

金亭布衣服鞍馬不受但受朝臣贈行

詩覽而歎曰東方有人禡遣曹敏脩河

齋禹玄寶等如京師謝恩○漆原府院

君尹桓卒

丁卯

定百官冠服

戊辰

○誅廉興邦林堅味都言敷李成林王福海并其族黨先是前密直副使趙胖斬興邦豪奴李光于白州興邦聞之大怒誣胖謀叛收其妻及母鞠胖于巡軍胖曰貪婪宰相六七人縱奴四方奪人民田戕虐百姓是大賊也今斬李光者為國家除民害耳何云謀叛時興邦為巡軍上萬戶必欲誣服治極慘酷胖竟不服後數日禍如崔瑩第議獄命釋胖遂誅興邦等并族黨五十餘人其子孫

在襁褓者皆投之江於是辨覆林麋等
奪占田民遣使各道捕誅家臣惡奴凡
千餘人獨執李仁任安置京山府○禍
納崔瑩女為妃○帝以鐵嶺迤北本屬
于元並令歸之遼東命立鐵嶺衛遣遼
東百戶來告禍稱疾不出迎○崔瑩勸
禍攻遼東遂徵八道兵四月乙巳朔禍
與瑩如西海道至鳳州召 太祖始言
攻遼之意 太祖條陳其四不可禍不
納次平壤以瑩為八道都統使曹敏修

為左軍都統使 太祖為中軍都統使

諸將分屬傅洪武年誦令國人復胡服

○五月庚辰左右軍渡鴨綠江威化島

左右都統使再請班師禍與瑩不聽我

太祖乃諭諸將以逆順禍福遂回軍邊

渡鴨江禍聞之與瑩馳還京都六月癸

卯朔諸軍來屯近郊為書請去瑩禍不

聽欲拒戰乙巳太祖由崇仁門入與

左軍犄角而進時禍與瑩在八角殿諸

軍毀垣攔入郭忠補等直入索瑩遂流

初一日

營○丙午復行洪武年號禁胡服時大明聞禍舉兵將討之聞還軍處之○庚戌放禍于江華○辛亥曾敏修以定妃教立禍子昌年九歲是為辛昌○朴宜中還自京師帝引見厚待遂寢鐵嶺立衛之議○倭寇光州以三道都體察使皇甫琳及副元帥等往擊之判典校事康好文妻文氏陷賊不污墜于石崖為藤蘿障蔽得不死鄉里驚嘆○遣貧成事高仁烈政堂文學俊長壽以禍遜

初九日

丙午

位表如京師○流竄數修于昌寧○八月以李穡為門下侍中我太祖守侍中開書筵鄭夢周權近鄭道傳並充書筵官○鄭地擊倭于南京大敗之時倭寇慶尚全羅揚廣自秋及夏屠燒州縣地為三道都指揮使擊倭大捷人謂非此戰三道民幾盡矣○九月遷禍于驪

興

己巳
○春二月慶尚道元帥朴歲等以兵艦擊對馬島燒倭船三百艘及廬舍殆盡

乙卯

元帥金宗衍崔七夕朴子安繼至搜被
擄民百餘以送○姜淮伯等還自京師

○六月沈德符判三司事安宗源門下

資成事鄭夢周藝文館大提學○七月

禍生日 太祖與判三司沈德符判關

城府裴克廉門下評理鄭地等享至于

黃驪府○琉球國中山王察度遣玉之

奉表稱臣歸我被倭擄掠人口獻方物

使到順天府都堂以前代所不來難其

接待昌曰遠人來貢待之薄無乃不可

乎使之入京慰送可也遣迎接使以待
之又遣典客令金允厚等齎答書及禮
物報聘于琉球國○命李穡李琳及我
太祖御履上殿資拜不名各賜教書銀
五十兩彩段十匹馬一匹○冬十月丙
申霧丁酉大雨震電丙午霧及三霧三
日○十一月己巳霧甲戌地震乙亥雷
○放昌子江華我太祖與沈德符等
定策立定昌君瑤為王是為恭讓王○
李穡自長湍入賀穡辭職歸長湍別業

○十二月臺諫交章司宰副令尹紹宗亦上書以禍昌非王氏殺之

庚午

○殺前原川府院君判三司事邊安烈于流所初金仔獄起辭連安烈金仔不服刃裂足掌尉以火乃服遂成獄詞卽舍尹紹宗李詹具思忠等疏論安烈之罪請正典刑王不允流漢陽時有強盜劫人於城門外紹宗等言吳元濟遣人殺武元衡之事以為劫盜之發實由安烈蓋阮西飛逃又上疏請明其罪王下

其疏憲司就疑所勿更鞠誅之憲司移
牒漢陽府尹金伯興誅安烈於是紹宗
等又論伯興不問而誅請徵黨惡掩覆
之罪乃遣臺官分鞠安烈黨與李乙珍
李琳李貴生李庚道鄭地元庠等于京
外拷掠甚酷伯興死獄中○以我 太
祖領八道軍馬置軍營分番更宿廩以
軍資○王御經筵○左司議吳思忠門
下舍人趙璠等上疏請治李穡曹敏修
議立昌迎禍之罪臺諫繼論請置極刑

三遣吳思忠鞠穡于長湍○臺諫請鞠
彛初之黨遂下禹玄寶等于巡軍逮繫
李穡等于清州獄王昉趙胖還自京師
啓禮部召臣等曰爾國有坡平君尹彛
中郎將李初者來訴于帝言高麗李侍
中立其姻親王瑤將犯上國宰相李穡
等以為不可即將李穡曹敏修李琳邊
安烈權仲和張夏李崇仁權近李種學
李貴生等十人殺害將禹玄寶禹仁烈
鄭地金宗衍尹有麟洪桂陳乙端慶補

李仁敏等九人遠流在貶宰相潛遣我
來告天子仍請動兵來討乃出彛初所
記穢等姓名於是臺諫請鞠彛初之黨
留中不下會宗衍逃遂下玄寶有麟子
巡軍大獄遽起先鞠有麟峻急辭連崔
公括十餘人並下獄有麟憂憤不食死
梟首籍家逮穢琳仁烈仁敏地崇仁近
種學貴生等于清州獄遣尹虎等鞠之
會以清州大水王命釋之

辛未

○禮城江水赤沸三日○省五軍為三

軍都摠制以我○太祖為都統制使襄
克廉為中軍摠制使趙浚為左軍摠制
使鄭道傳為右軍摠制使○鄭道傳上
書都堂請誅李穡禹玄寶臺諫交章請
治穡玄寶種學等罪乃流穡于咸昌玄
寶于鐵原種學于遠地○冬省憲刑曹
上疏曰道傳濫居功臣之列內懷姦惡
外示忠直染污國政請加其罪三放歸
其鄉奉化縣○判開城府鄭地卒謚景
烈○召還李穡李宗仁

壬申

○四月諫官金震陽李擴李敢李來權
弘等上疏曰道傳起身賤地竊位堂司
欲掩賤根謀去本主織成萋菲之罪連
坐衆多之人趙浚等一二卿相偶起嫌
隙與道傳同心賣弄權勢誘脅諸人閤
在等為扇亂之羽翼紹宗璩等為造言
之喉舌唱和而起廣張罪網衆心危懼
咸怨咨嗟請鞫問浚閤在紹宗璩之罪
明正典刑道傳乃於貶所典刑疏上留
中不下明日震陽等伏閤更請王召侍

中沈德符鄭夢周議遂流浚閻在紹宗
璩又與憲府姜淮伯鄭熙金卣徐甄李
作李申連日交章請誅浚道傳等並劾
吳思忠王命先鞠閻等諸人已而夢周
遇害籍其家流震陽李擴李來李敢權
弘鄭熙金卣徐甄李作李申于遠地放
穡于韓州尋徙驪興又廢趙珙種學種
善震陽擴為庶人五月憲府又上疏贊
浚忠功極陳夢周之罪曰餘黨僕長壽
李茂李琳金履安魯生崔關金瞻請並

罷遠流從之○召還趙浚鄭道傳南閩
○都評議司事執宗親南平君和等六
人及禹玄寶五父子安翊金南得崔乙
義王承貴都興安瑗柳廷顯許應朴興
澤安俊申元弼崔咸流于遠地使經歷
張志和啓王曰玄寶等屬于罪犯更欲
謀亂禍機甚迫未及啓聞已將分配于
外○以趙浚判三司事京畿左右道節
制使南閩慶尚道節制使各道皆如之
使掌其道戎馬節度鄭道傳奉化郡忠

義君趙胖知密直司事權仲和商議贊
成事尹虎成石璘贊成事李仁敏判開
城府事慶儀鄭熙啓門下評理金士衡
三司左使尹師德判密直事金用超金
乙貴李幾金相並為密直副使李行藝
文提學○王召司藝趙庸曰子將與李
侍中同盟卿聽李侍中言草盟書來庸
言列國同盟則古有之矣若臣同盟則
無載籍可據王曰第草之庸言於我
太祖退草以進○秋七月王遜于原州

尋移軒城郡封恭讓君高麗仁

尋移軒城郡封恭讓君高麗仁

仁

仁

廣師先生皇極經世書東史補編通載卷之九終

東史補編通載卷之九終





○新羅創興輪寺許慶人為僧尼

十二年

高句麗安原王十四年○百濟聖王二

東魏靜帝十一年○新羅真興王五年○

甲子梁武帝四十二年○西魏文帝十一年○

經世之申二百五十三

于芒山遂拔洛陽

癸亥東魏元武定高歡大敗西魏宇文泰軍

壬戌

經世書補編卷之四 四十五

辛酉

